

SILAT

## Alfian sasar tiga matlamat utama



**DAPAT DUIT RAYA:** Muhammad Nur Alfian menerima anugerah dan sijil penghargaan daripada Timbalan Presiden Persisi, Mohd Shah Hashim, dalam Majlis Iftar/Jamuan Malam Penghargaan bagi pesilat Sukan SEA Jumaat lalu. – Foto PERSISI

Jaguh silat negara  
jangka pesilat  
Vietnam jadi pesaing  
utama bagi gelaran  
juara dunia, pertahan  
emas Sukan SEA  
dan Sukan Asia

► ISMAIL ALI  
ismail@sph.com.sg

**PENDEKAR** muda negara, Muhammad Nur Alfian Juma'en, menetapkan tiga matlamat utama dalam tiga tahun mendatang, khususnya meraih gelaran juara dunia dalam Kejohanan Pencak Silat Sedunia tahun depan.

Bercakap kepada *Berita Harian* dalam majlis Iftar/Jamuan Malam Penghargaan Persekutuan Silat Singapura (Persisi) bagi pemenang pingat Sukan SEA Jumaat lalu, pemenang satu-satunya pingat emas silat negara itu berkata beliau turut berazam mempertahankan kejuaraannya dalam temasya dwitahunan itu di Kuala Lumpur dalam 2017 dan memenangi pingat emas dalam acara silat pertama dalam Sukan Asia Jakarta pada 2018.

"Saya menjangka pesilat Vietnam Tran Dinh Nam bakal menjadi pesaing dan halangan utama saya bagi mencapai ketiga-tiga matlamat itu iaitu dalam Kejohanan Pencak Silat Sedunia pada tahun depan, Sukan SEA Kuala Lumpur pada 2017 dan Sukan Asia Jakarta 2018," jelas Muhammad Nur Alfian, yang mengalahkan Tran dalam Sukan SEA Jun lalu bagi mempertahankan kejuaraan dalam acara tanding Kelas F (70-75 kilogram) yang dimenangkannya dalam Sukan SEA Myanmar 2013.

"Untuk mencapai sasaran itu, saya perlu meningkatkan kemahiran saya dari segi teknikal untuk mengatasi kelebihan Tran, yang mempunyai tendangan kuat dan mahir membuat jatuhan.

"Saya yakin dapat mengatasinya lagi jika beliau menggunakan teknik yang sama tetapi pastinya beliau juga akan meningkatkan diri. Oleh itu saya perlu membuat persiapan mulai dari sekarang."

Muhammad Nur Alfian tewas 2-3 kepada Tran dalam Kejohanan Pencak Silat Sedunia di Phuket, Thailand, Januari lalu tetapi mengubah strategi daripada menyerang kepada menunggu dan melancarkan serangan balas bagi membolehkannya mengatasi juara dunia dari Vietnam itu 5-0 dalam Sukan SEA lalu.

Kemenangan itu membolehkan silat menyumbangkan sebutir pingat emas dalam kejayaan cemerlang Team Singapore meraih 84 pingat emas dalam temasya tersebut, kejayaan terbesar negara dalam sejarah Sukan SEA.

Silat turut menyumbang satu perak dan enam gangsa dalam pungutan pingat keseluruhan negara.

Kesemua pesilat yang memenangi pingat menerima anugerah dan sijil penghargaan daripada Persisi dalam majlis jamuan malam tersebut dengan Muhammad Nur Alfian menerima habuan terbesar sebanyak \$1,000 atas kejayaannya.

"Muhammad Nur Alfian baru berusia 18 tahun dan beliau memenangi pingat emas Sukan SEA pertamanya pada usia 17 tahun.

"Beliau mempunyai masa depan yang cerah dan saya yakin beliau boleh memenangi lebih banyak kejuaraan lagi jika beliau terus bekerja keras dan bersungguh-sungguh mengikuti latihan dan tunjuk ajar jurulatih," kata Ketua Pegawai Eksekutif Persisi Sheik Alau'ddin Yacoob Marican.